

## Allannguutissatut siunnersuut

uunga

**Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. Xx, xx. xxx 2019-imeersoq**

Aappassaanneerinissamut Naalakkersuisunit saqqummiunneqartoq.

## § 1-imut

**1. § 1, nr. 3-imi, § 38 f-tut** nutaatut ilanngunneqarpoq:

”§ 38 f. Akileraartarnermut ingerlatsiviup inunnuat aningaaserivimmi nalunaarsorsimasumik kontoqartunut sulinermit ilanngaata siumoortumik qaammammut ataasiarluni tunniussinnaavaa. Tunniussineq pissaaq kingusinnerpaamik isertitat A-t, akileraarutit B-nik aamma pissarsianit akileraarutit §§ 38 c-38 d-imi isertitanut tunngavigisani pineqartunut ilaasunik akiliineq pillugit paasissutissat akileraartarnermut ingerlatsivimmit tiguneqareernerisa kingorna qaammatit marluk qaangiunneranni. Qaammammut ataatsimut tunniussinermi, ukiumi sulinermit ilanngaata tamarmiusup akileraarutit nalingata 1/12-ia qaangerneqarsinnaangilaq, takuuk § 38 b, imm. 1, nr. 1, uniffik kingulleq.

*Imm. 2.* Inuup ukiumi isertitaqarfiusumi isertitassanut tunngavigisaanni tamarmiusuni, atugassat aningaasartaasa annertussusissai § 38 b, imm. 1-imi aalajangersagaasut qaangerneqassat, akileraartarnermut ingerlatsiviup ilimagippagu, akileraartarnermut ingerlatsiviup siumoortumik sulinermit ilanngaata tunniutinngissinnaavaa imaluunniit tunniussassat ikilissinnaallugit.

*Imm. 3.* Naalakkersuisut siumoortumik tunniussinissamut piumasaqaatit pillugit, kiisalu naatsorsuisarneq aamma sulinermit ilanngaata siumoortumik tunniunneqartarnera pillugit maleruagassanik erseqqinnerusunik aalajangersaasinnaapput.”

**2. § 1, nr. 3-imi, § 38 g-tut** nutaatut ilanngunneqarpoq:

”§ 38 g. Akileraartarnermut ingerlatsivik ukiumi akileraaruseriiffiusumi ulloq 1. septembari tikitsinnagu isertitanut tunngaviviusut naatsorsorlugit inaarutaasumik, takuuk § 38 c-38 d, sulinermit ilanngaata aammalu 38 f malillugu sulinermit ilanngaata siumoortumik tunniunneqartut naatsorsorlugit suliarissavai. Sulinermit ilanngaata siumoortumik tunniunneqartoq, sulinermit ilanngaammit naatsorsorneqartumit annikinnerusimappat, sinneruttut tunniunneqassapput. Tunniussineq, akileraaruserinermik ingerlatsineq pillugu Inatsisartut inatsisaanni § 25-imi akileraarutit sippuutaannik tunniussisarneq pillugu maleruagassat malillugit, pissaaq. Taamaattoq akileraaruserinermik ingerlatsineq pillugu Inatsisartut inatsisaanni § 25, imm. 2 malillugu ajunngitsorsiasaqaartitsisoqassanngilaq. Siumoortumik sulinermit ilanngaata annertunaarluni tunniunneqarsimappat, aningaasartai akileraaruserinermik ingerlatsineq pillugu Inatsisartut inatsisaanni § 24-imi maleruagassat malillugit akileraarutissaat sinnerisut, akilersinneqassapput.

*Imm. 2. Akileraartarnermut ingerlatsiviup ukiumi sulinermit ilanngaammut aammalu sulinermit ilanngaait siumoortumik tunniunneqartunut naatsorsukkat, ukiumoortumik nassiuttassavai.”*

## § 2-imut

**3. § 2, imm. 1, imatut oqaasertalerneqarpoq:**

” Inatsisartut inatsisaat ulloq 1. januar 2020 atuutilerpoq, taamaattoq takukkit imm. 3-4.”

**4. § 2, imm. 3 kingorna, immikkoortutut nutaatut ilanngunneqarpoq:**

” *Imm. 4. § 1, nr. 3-ip, § 38 f-ip aamma 38 g-ip piffissaq atuutilerfissaat nalunaarummi aalajangersarnissaanut Naalakkersuisut piginnaatinneqarput. § 38 f aamma 38 g atuutilerneranni, § 38 e atorunnaarsinneqassaaq.”*

§ 2, imm. 4-5, tamatuma kingorna § 2, imm. 5-6-nngorput.

## **Nassuiaatit nalinginnaasut**

Aningaasaqarnermut Akileraartarnermullu Ataatsimiititaliap siunnersuutip aappassanneerpeqarnissaanut isumaliutissiisummini kaammattuinerata akuerineqarnissaa, allannguutissatut siunnersuummi siunertaavoq.

Allannguutissatut siunnersuummi aalajangersakkat, ukiup isertitaqarfiusup ingerlanerani sulinermit ilanngaait siumoortumik qaammatikkaartumik tunniunneqartarluni, tunniunneqartarnissaanik ajornarunnaarsitsisussat, ilanngunneqarput. Periaatsit suleriaatsillu siumoortumik tunniussisalernissamik ajornarunnaarsitsisussat atuutsilerniarnerat sivisusussaammat, Naalakkersuisut siumoortumik tunniussisarneq pillugu aalajangersakkanik nalunaarummi atuutsitsilernissamat piginnaatinneqarput.

Siumoortumik tunniussisarneq pillugu aalajangersakkat atuutilernissaasa tungaanut, sulinermit ilanngaait nalinginnaasumik akileraarusiisarnerup ingerlanneqarnera malillugu, ukiup isertitaqarfiusup kingorna ukiumi tunniunneqartassapput. Allannguutissatut siunnersuutip aamma atuutilernerani taamaalilluni sulinermit ilanngaait ulloq 1. januar 2020 atuutilissaaq, aammalu 2020-imi ukioq isertitaqarfiusoq aallarnerfigalugu atuutilissalluni.

*Sulinermit ilanngaait siumoortumik tunniunneqartarnera*

Akileraartarnermut ingerlatsiviup isertitat il.il. pillugit paasisutissanik tigusaqarnerat kingorna qaammatit marluk qaangiunneranni, sulinermit ilanngaait siumoortumik tunniunneqassaaq. Tamatuma atuunnerani siumoortumik sulinermit ilanngaait januaarimi isertitanut A-nut tunngassuteqartoq, martsimi tunniunneqassasoq naatsorsuutigineqarpoq,

aammalu isertitanut A-nut februaarimi isertitarineqartunut aprilimi tunniussisoqassaaq, ilaalu ilanngullugit.

Innuttaasup ukiumi ataatsimi isertitanut tunngavigisai, sulinermut ilanngaammut annertussusissaliussanit aalajangersarneqartunit annertunerussasut, akileraartarnermut ingerlatsiviup ilimagippagu, akileraartarnermut ingerlatsiviup sulinermut ilanngaat annikillissinnaavaa imaluunniit siumoortumik tunniutinngissinnaallugu.

Ukiup isertitaqarfiusup kingorna ukiumi akileraartarnermut ingerlatsiviup akileraarusiinermit atatillugu isertitanut tunngaviusut tamarmiusut, sulinermut ilanngaat aammalu ilanngaatit siumoortumik tunniunneqartut, naatsorsussavai. Naatsorsuinerup takutippagu sulinermit ilanngaat siumoortumik tunniunneqartoq appasippallaarsimasoq, sinneruttut akileraarutit sippuutaattut tunniunneqassapput. Sulinermit ilanngaat siumoortumik annertunaarlugu tunniunneqartarsimappat, tamanna akileraarutissat sinnerisut akilersinneqassaaq.

Siumoortumik tunniussinermi, ilaatigut sulisitsisunut nalunaaruteqarnissamik piunasaqaatini taakkualu IT atorlugu periaasianni allanngortoqarsimasoq tunngavissaatinneqassaaq aammalu akileraartarnermut ingerlatsiviup IT atorlugu periaasiani atugassanik nutaanik ineriartortitsinissaq pisariaqartussaalluni. Tamatuma saniatigut tamanna sioqqullugu qitiusumi aningaaserivimmi nalunaarsorsimasumik kontumik pilersitsinissaq naleqqutissaaq. Ataasiakkaanut siumoortumik tunniunneqartussat annertussusaannut, isertitat A-t pillugit nalunaarutigineqartut, unerartitsisussaataasunit akileraartarnermut ingerlatsiviup tigusagai, kiisalu akileraarutininik B-nik aamma pissarsianit akileraarutininik il.il. tunniussinertit, aallaavigineqassapput.

### **Allannguutissat siunnersuutip aningaasaqarnikkut sunniuteqarnissaa**

Ilanngaatip atuutsinneqalerneranut allaffissornikkullu aqunneqarneranut aningaasartuutit qaffannerannik, allannguutissat siunnersuut malitseqassasoq naatsorsuutigineqarpoq. Aningaasartuutit IT-mik, aaqqissuussinermi ukiumi siullermi ilanngaatip naatsorsorneqarnissaanut aammalu ukiup tulliani naggataatigut naatsorsuinerup nalaani tunniunneqarnissaanut aaqqissuunneqartussamik, ineriartortitsinissamik pisariaqartitsinermit matuma siuliani taaneqartumut annertuumik tunngassuteqarput. Ingiaqatigitillugu allannguutissat siunnersuut manna nalunaarutikkut atuutsinneqartussanngorpat, IT atorlugu periaatsit ingerlaavartumik tunniussisarnernik aqutsinissamut allanngortinneqartussaassapput. Siunnersuutip atuutsinneqalernissaanut aningaasanut inatsimmi aningaasaliissutit pioreersut 2020-imi ukiumi aningaasaliiffiusumut siuartinneqassasut naatsorsuutigineqarpoq, ilaatigut IT-p teknikkitaanni pisariaqartitsineq taakkunungalugu aningaasartuutissat erseqqinnerusumik paasinarsisinnissaannut aningaasalersuinissaq siunertaralugu.

Inuussutissarsiortut taamatuttaaq sunnerneqarsinnaapput, tassami tamanna sulisitsisut akileraarutininik A-nik ingerlaavartumik nalunaarutiginnittarnerisa allannguuteqarneranik malitseqassasoq naatsorsuutigineqarmat.

Qaammatikkaartumik sulinermut ilanngaatiq atuutsinneqalerneranut aningaasartuutit eqqaassanngikkaanni, allannguut annertuunik aningaasaqarnikkut sunniuteqassagatinneqanngilaq. Siumoortumik sulinermut ilanngaatiq atuutsinneqalernerata malitsigisaanik, ilanngaat ataasiakkaat isertitaqarlutik inuussutissarsiulernissamut qanillattornissaannut iluaqutaassaaq, tamannalu siunnersuutip kajumissuseqalersitsisumik sunniuteqarneranut pitsaasumik sunniisinnaavoq.

Teknikkikkut tunngavigisassat pigineqalerpata, sulinermut ilanngaat pillugu aalajangersakkat nalunaarummi atuutsinneqalissapput. Ulloq 1. januar 2021 atuutilersumik aalajangersakkat atuutsinneqalissappata, aammalu 2021-imi ukioq isertitaqarfiusumut atuutilerlutik, siumoortumik tunniussineq 2021-mut Aningaasanut inatsimmut sunniuteqassaaq.

### **Allannguutissatut siunnersuummi aalajangersakkanut ataasiakkaanut nassuiaatit**

#### *§ 1-imut*

Nr. 1-imut (§ 38 f nutaaq)

Aalajangersagaq siunnersuutigineqartoq nutaajuvoq. Aalajangersakkap atuutilernerani, aningaaserivimmi nalunaarsorsimasumik kontoqaraanni ilanngaatiq tunniunneqarnerani atorneqarsinnaasumik, ukiumi isertitaqarfiusumi sulinermut ilanngaatiq ilaa siumoortumik tunniunneqarsinnaalissaaq. Sulinermut ilanngaat, akileraartarnermut ingerlatsivimmi isertitat isertitanut tunngaviusuni pineqartunut ilaasut pillugit paasissutissat tiguneqarnerisa kingorna qaammatit marluk missaasa qaangiunneranni, qaammatikkaartumik tunniunneqassaaq.

Aalajangersagaq imm. 2-mi aalajangersakkap malitsigisaanik akileraartarnermut ingerlatsiviup siumoortumik nalunaarsuineq imaluunniit ukiup ingerlanerani isertitat pillugit paasissutissat il.il. aallaavigalugit, ukiumi isertitaqarfiusumi sulinermut ilanngaat qaffasippallaamik tunniunneqarsinnaanera aarlerinaateqarpat, sulinermut ilanngaat annikillilersinnaavaa imaluunniit tunniutinngitsoorsinnaallugu.

Imm. 3-imi aalajangersakkami, Naalakkersuisut siumoortumik sulinermut ilanngaat qanoq naatsorsorneqassanersoq tunniunneqartassanersorlu maleruagassanik erseqqinnerusunik aalajangersaanissamut piginnaatinneqarput. Tamatuma saniatigut siumoortumik sulinermut ilanngaammut piunnaasaqatit erseqqinnerusut aalajangersarneqarsinnaapput, ilanngullugit piffissaq eqqorlugu nalunaarutiginninnerit imaluunniit akiliinerit tiguneqarsimasut.

Nr. 2-imut (§ 38 g nutaaq)

Aalajangersagaq imarisamigut siunnersuummi § 38 e-mut saqqummiunneqartumut naapertuuppoq, taamaattoq sulinermut ilanngaatiq siumoortumik tunniunneqarsinnaanerata atuutilersinnissaanik siunnersuuteqarnerup malitsigisaanik, iluarsiiisoqarluni.

Aalajangersagaq malillugu akileraartarnermut ingerlatsiviup akileraarusiinermit atatillugu ukiumoortumik isertitanut tunngaviusut ataatsimoortillugit, ukiumi isertitaqarfiusumi

sulinermut ilanngaat aamma sulinermut ilanngaammik siumoortumik tunniussinerit, naatsorsussavai. Ukiup isertitaqarfiusup ingerlanerani siumoortumik sulinermut ilanngaat annikinaarlugu tunniunneqartarsimappat, sinneri innuttaasumut tunniunneqassapput. Aningaasartaasa ernialerneqartussaanninnerat eqqaassanngikkaanni, aningaasartai akileraarutitut sinneruttut suliarineqassapput.

Siumoortumik sulinermut ilanngaat annertunaarlugu tunniunneqartarsimappat, tamanna paarlattuanik akileraarutit sinnerisut suliarineqassaaq. Taamatut pisoqarnerani akileraaruserinermik ingerlatsineq pillugu Inatsisartut inatsisaanni § 24, imm. 2 malillugu 8 procentimik tapeqartillugu aningaasartai ilaneqassapput. Taamaaliornermi innuttaasup iliuseqannginnermigut imaluunniit iliuseqarnermigut siumoortumik sulinermut ilanngaammik qaffasippallaamik tunniussisoqartarneranut peqataasinnaanissaa eqqarsaatigineqarpoq, assersuutigalugu B-nik isertitaqarnissamik naatsorsuuteqarneq siumoortumik nalunaarsornagu imaluunniit akileraarutitik B-nik annikinaarlugit akiliilluni.

Imm. 2-imi aalajangersakkap malitsigisaanik ukiup isertitaqarfiusup kingorna ukiumi isertitanut tunngaviusunut aamma sulinermut ilanngaammut ataatsimoortumik naatsorsukkat ukiumoortumik nassiunneqartassapput.

#### *§ 2-imut*

Siunnersuutigineqarpoq § 2 allanngortinneqassasoq, taamaalilluni akileraartarnermut ingerlatsiviup sulinermut ilanngaammik siumoortumik tunniussisarnerit suliarinissaannut piareernerani, siumoortumik tunniussisarneq pillugu aalajangersakkat nalunaarummi atuutsinneqarsinnaalissallutik.

Siumoortumik tunniussisarneq pillugu aalajangersakkat atuutsinneqalerpata, § 38 e, sulinermut ilanngaat ukiup isertitaqarfiusup kingorna ukiumi tunniunneqartarnissaanut tunngasoq, atorunnaarsinneqassaaq.